

Poboljšanje vještina u stručnom obrazovanju i obuci

Minhen, 04 – 05. maj 2017

U organizaciji Evropskog komiteta sindikata obrazovanja (ETUCE) i Evropskog sindikalnog instituta (ETUI) održan je seminar u Minhenu u periodu 4-5. maja 2017. godine na temu *Poboljšanje vještina u stručnom obrazovanju i obuci*. Seminaru su prisustvovali stručnjaci za stručno obrazovanje i obuku (VET) i predstavnici sindikata obrazovanja, članova Evropskog komiteta sindikata obrazovanja (ETUCE) iz 20 evropskih zemalja. Ovo je šesta godina da se organizuje zajednički trening seminar za nacionalne stručnjake za stručno obrazovanje i osposobljavanje, predstavnike sindikata obrazovanja, koje podržava Evropski sindikalni institut (ETUI). Učesnici seminara su bili, osim zemalja EU / EFTA-e i zemalja kandidatkinja, predstavnici Gruzije, Jermenije, Kazahstana, Kosova, Ukrajine i Tadžikistana. Sindikat prosvjete Crne Gore predstavljao je kolega Jovan Drašković, član Glavnog odbora SPCG-a.

Učesnici seminara raspravljali su o novim izazovima sa kojima se suočavaju nastavnici u stručnom obrazovanju. Fokus je bio na tome kako obezbijediti sticanje odgovarajućih znanja i vještina za učenike, kao i profesionalni razvoj nastavnika u svim oblicima stručnog obrazovanja i obuke. Što se tiče postizanja visokokvalitetnog stručnog obrazovanja i obuke, zajednička zabrinutost sindikata obrazovanja iz cijele Evrope su: nizak status VET-a, nedovoljna ulaganja u sisteme stručnog obrazovanja i obuke, nizak ugled i plate nastavnika, izostanak odgovarajućeg socijalnog dijaloga.

Nakon prezentacije Albina Malureanu-a (Sindikat obrazovanja Njemačke) učesnici seminara upoznali su se sa njemačkim sistemom stručnog obrazovanja i obuke i izazovima s kojima se nastavnici suočavaju danas. Učesnici su posjetili *Berufsschule für Fahrzeugtechnik - Eisenbahn – Fahrbetrieb*, školu automobilskeg sektora koja obučava auto mehaničare, vulkanizere i željezničare. Direktor škole Joe Lammers objasnio je pojedinosti dualnog sistema obrazovanja u Njemačkoj i istakao koristi od visokokvalitetne i plaćene obuke učenika za njih same, za kompanije i stručne škole.

Drugog dana seminara Ann Vanden Bulcke iz Evropske komisije predstavila je politiku Evropske unije, koja se tiče vještina potrebnih za integraciju izbjeglica i migranata, naglašavajući važnost digitalne pismenosti i sticanja vještina potrebnih tržištu rada. Učesnici treninga imali su priliku podijeliti i analizirati primjere dobre prakse sindikata u pružanju podrške nastavnicima stručnog obrazovanja, kao i novih izazova sa kojima se oni suočavaju.